

Nyovara Wao Manasyin Yohanes Po Ratoe 1 YOHANES

Ayao mo kove raunande

¹ Syo nyovara waowe so ratoe ore wasai indamu syo Yesus Kristus aura kakavimbe wasai. Opamo awainamo “Ayao mo kove raunande,” weye Opirati po kovo nuge nuganuije raunande.✧ Arono munije so ama manasyinoe, Opamo no to. De no mine vone so rai, reami Apa arakovo po reansatutire reamamo reamo Apa ayaowe raraniv muno reamo aeno reansamije rai to. Reamo aeno reansamije rai muno reamo aijaro reansaneme rai to. ² Opamo aroron kakavimbe ti reamo aen to, omirati reamo raura wasaije so. Arono manasyinoe, nowo Injayo Amisye autan muno kovo nuge nuganui no irati Ai. Opamo de Po anasine raroron kakavimbe reansai, weti reamo Apa kove wato ravovo wasai. ³ Ana reamo raeno reansamije rai muno reamo raraniv wemirati reamo ravov ore wasai tavon, indamu weape reame wambe intabove tenambe. Wambe intabove Injayo Amisye ai muno Apa Kavoyesus Kristus ai. ⁴ Reamo ayaowe so ratoe indamu wansanuga ranayanambe rave.

Vare raurata kove rai, yara kaumure raurata ayao kakai rai

✧ **1:1** Yohanes 1:1

⁵ Ayao reamo raranivo Yesus ai ti reamo raura ore wasai mi so: Amisye pamo var, weti kaumure no Aije jeben bayave. ⁶ Ranivara wamo raura wamare wambe intabove Yesus ai weramu wamanya kaumure bo rai, weamo ayao tugae omi wambeta rai so ma jewena, yara wamangkarive vayavea. ⁷ Ranivara wangkova wano no vare ama uga rai maisyare muno Injayo Amisy opamo no vare ama uga rai, wea umba wambe intabove wansai vambinibe. Muno Apa Kavo Yesus, wepi aunande ti kakai, Po wama ayao kakai kotare rapaya inda wansanuga ngkakavin.

⁸ Ranivara wamo raura wamare wamamo ayao kakaije meweno wansaija, wea umba taune wamangkarive taune wansai, umba ayao tugae meweno wansai. ⁹ Ranivara wamo wama ayao kakai raura kakavimbe Amisye ai, weamo Amisye po wama ayao kakai umaso rapaya irati wansai indamu wansanuga ngkakavin. Po wama ayao kakai rapaya weye Opamo no tawan no Apa urairi rai muno Apa ana dave mamai tenambe. ¹⁰ Ayao Amisye mo raura mare vatan tenambe wamamo wamo ayao kakaije rave. Weti are pirati po raura pare ayao kakaije meweno ai, beare wemaisyamo po Amisye aijaseo aruriate rai to. Umba Amisye apa ayao meweno vatano napije ai to.

2

*Wamare wamo Amisye aen, weamo wambeta
Apa ayao rai*

¹ Sya arikainyo inanuga no wasai, anakotare so syo ratoe more irati wasai indamu vemo wapo ayao kakai rave inya. Weramu ranivara wamo

ayao kakai inta rave, Vatane inta be marimbe payao wansai no Injayo Amisye amune rai. Opirati Yesus Kristus taunep, Opamo mamai dave. ² Wepi po anasine raunande kakai indamu Po wama ayao kakai ranawan ti mpaya wansai, wirati Po wansaugav wamakare Amisye ai. Po waboma ayao kakai ranawane jewen, yara vatan tenambe mine so awa ayao kakai ma Po ranawan tenambe.

³ Ranivara wambeta irati Amisye apa ananyao Po wansatuti dai rai, wea umba wandaen wamo Amisye aen to ije. ⁴ Are pirati payao pare, “Risyo Amisye aen ivae,” weramu beto Amisye apa ananyaowe raije ramu, vatano napije aruriat akoe piye muno ayao tugae meweno ai. ⁵ Yara vatano beto Amisye apa ayao rai, vatano napije muinyo Amisye ai ma mamai to. Ranivara wamare wandaen wambe intabove Amisye ai, weamo wamo raen no taiso: ⁶ Vatano rui pirati po raura pare opamo be intabove Amisye ai, syare apa ana dave mo Yesus apa ramaisy.

Amisye apa ananyao wanyine raugaje wansai

⁷ Sya arakovo inanuga no wasai, ayao ridatoe ore somamo syo wasatutiro ananyao wanyine inta rai jakato ma jewena. Yara wusyino idaura wasai yarawe wapanave Yesus Kristus ai kobeyoe ti no wasai to, wemirati idaura rijati akato. Ananyao wusyin wasatuti dai umaso mamamo Amisye apa ayao wapo ranaun to mi vae. ⁸ Weramu ananyao raura so omamo nggwanin tavone ma. Ananyaowe somamo Kristus beto rai muno weapamo wabeta rai tavon. Weye

kaumure, omi raurata irati ayao kakaije rai, merere nto raumandi. Yara vare, omi raurata irati ayao kove rai, omamo nsaneka tutir.

⁹ Are pirati po raura pare opamo no vare rai weramu anuga mamuno apa arakova ai, vatano napije pamo kaumure ta no tawan no ai mansanana unumeso. ¹⁰ Are pirati muinyo apa arakova ai, opamo no tawan kobe vare ama uga rai. Taune anuga ngkakavin, weti po vatano kaijinta maugavo ayao kakai raron oma jewena.

¹¹ Yara are pirati anuga mamuno apa arakova ai, opamo no no kaumure ama uga rai. Munu panya kaumure ama uga bo rai, weti peratori mamaundi muno po apa unanui raito raene jeben. Maisyare omai ti, apa ana dave ma mamaisye ramu.

¹² Syo ayaowe so ratoe more irati arikainyo inanuga no wasai,
weye Kristus kakaijo wasai ti Amisye po wapa ayao kakai rapaya wasai.

¹³ Syo ayaowe so ratoe more irati ajae wasai,
weye weapo Amisye aen to,
wepirati arono munije so ama manasyi-
noe no to.

Syo ayaowe so ratoe more irati vatano kamurame wasai,
weye wapo Anakakai Akoe apinde to.

¹⁴ Syo ayaowe so ratoe more arikainyo inanuga no wasai,
weye weapo Injayo Amisye aen to.

Syo ayaowe so ratoe ajae wasai,
weye weapo Amisye aen to,
wepirati arono munije so ama manasyi-
noe no to.

Syo ayaowe so ratoe more vatano kamurame wasai,
 weye weabambunin muno Ayao Amisye
 ntuna wasanuga rai muno wapo Anakakai
 Akoe apinde to.

¹⁵ Vemo wasanuga ntento mine so rai jinya muno ama anakotaro ntuna no ama uga rai, rai jinya. Weye wasanuga ntento ana mine so rai, weamo muinyo Injayo Amisye ai ma meweno wasanuga rai. ¹⁶ Mine so ama bekere maisyare so: wama bekero ngkakainoanive, wansanuga ntento ananugo wamo raeno wansamije raije rai, muno wansararino taune wama vambunine muno wama ananugo manui rai—anakotar tenambe umaso mamu Injayo Amisye apa ma jewen, yara mine so ama ma. ¹⁷ Mine so indati raumandi, muno ama anakotaro ntuna ama uga rai, wemirati wansanuga ntento rai, raumandi tavon. Yara vatano utavondi Amisye apa bekere rai, ukova nuge nuganui.

Yesus Kristus apa Marova Akoe

¹⁸ Sya arikainyo inanuga no wasai, munije so ama akari mararai mangkepan to. Wapo ranaun Yesus Kristus apa Marova Akoe indati de wusyimbe. Tugae, soamo vatano wanui inta wuje umarovave Kristus ai. Maisyare omai ti, munije so ama akari mangkepane mamu wandaendije. ¹⁹ Arono wusyinoe vatano umarovave Kristus aije umaso utantuna wansatavon no anugano Amisye rai, weramu wuje wansaora weye wanave tugaive jewena. Weramu ranivara wanave tugaive weratire ma, soamo nanawe wana tenambea

nene. Weramu wuje wansaora to, umba wandaendije wenanawamo wanave tugaive jewena.

²⁰ Weramu weapamo Amisye po Anawayo Vambunine raugaje wasai muno wapo Amisye apa ayao tugae raen tenambe. ²¹ Weapamo wapan-tukambe ayao tugae rai ma jewena, yara wadaen to, muno wapo ayao tugae raenamo aruriate ma inta no rai ramu. Wemi mbewar syo ratoe ore wasai.

²² Vatano rui pirati pangkarive? Vatano po Yesus amamarave, opamo pangkarive pare Yesus opamo Mesias napi Amisye po atutir de be akarive wansai jewen. Vatano napije be marovave Kristus ai, po Injayo Amisye amamarave muno Apa Kavotavon. ²³ Weye are pirati po Arikainyo Amisy amamarave, weamo Injayo Amisye tuna autane jewen. Yara are pirati po raura pare, “Syanave Arikainyo Amisye ai,” opamo Injayo Amisye tuna autan.

²⁴ Ayao wemirati wapo raraniv arono manasyin wapanave Yesus aijoe, ayaowe wato mi syare wapo raijar matuve. Wapare wapo raijar matuve, weamo wabe intabove tawan irati Arikainyo Amisye ai muno Injayo Amisy ai. ²⁵ Somirati Apa ana po raurairive wansai: kovo noa nuge nuanui.

²⁶ Syo nyovara waowe so ratoe ore wasai weye syare wapo raen vatane inta ware wo ananyao nsosobe raugaje wasai indamu wo wasaponae. ²⁷ Amisye po Anawayo Vambunine raugaje wasai, weti vatane wo wasanyao jewen kai, weye Anawayo Vambunine taune mo wasanyao anakotare rai tenambe. Anawayo Vambunin ama ananyao

Mo raugaje wasai mamō aruriate ma jewena, yara tugae ma. Maisyare omai ti, syare wabeta Ama ananyaowe rai indamu wabe intabove tawan irati Kristus ai.

²⁸ Sya arikainyo inanuga no wasai, syare wano tawan no Kristus ai indamu arono pakare no mine vone so raijamo, wanjanive ramu, muno arono de Po wansaen, wansamane no Amune rai nora. ²⁹ Yesus Kristus apa ana dave mamō mamai dave, omamo wandaen to. Weti umba syare wandaen tavon mamō are pirati apa ana dave mamai no Amisyē amune rai opamo Apa arikainye waino ai pije.

3

Vatano wamanave Yesus Kristus ai, Amisyē apa arikainye waino wansai

¹ Wakoe! Amisyē apa muinye ma manakoe rave wansaija! Weti Po wansawainamo Apa arikainye nawirati wam. Tugae, soamo wamamo Apa arikainye nanao wam!✧ Weramu vatano mine so wantatukambe wama Injayo Amisyē ai, weti wonayo Apa arikainye wansai tavon. ² Sya arakovo inanuga no wasai, soamo wamamo Amisyē apa arikainye waino wansai. Muno arono munijo makare umugamo indati wambeare rui, omamo wandaen dainya nene. Weramu wandaen arono Yesus Kristus pakare no mine so rai, indati wansanasine muno wansanuga mo Apa ramaisy, weye naije umba wamo aeno wansamije rai. Apa no mamō wamerananta wandaeno taune

✧ 3:1 Yohanes 1:12

Ai terave. ³ Vatano rui nawirati manaveano Kristus amen tai maisy, wenawamo wo taune mansine muno mansanuga ratayao da ngkakavimbe indamu ayao kakaije meweno mansai, maisyare muno Kristus kakavimbe omaisy.

⁴ Are pirati po ayao kakai rave, wepamo po Amisy e apa ananyaowe rakanyoandi. Weye ayao kakai mammo Amisy e apa ananyaomi rakanyoandi ije. ⁵ Wandaen Kristus de no mine so indamu Po wama ayao kakaije raupaisy. Opamo ayao kakaije inta no Ai jewen bayave. ⁶ Maisyare omai ti, are pirati be intabove Kristus ai, weamo po ayao kakai rave akatoe ramu. Yara are pirati po ayao kakai rave tawan tutir, weamo po Kristus aene ramu.

⁷ Sya arikainyo inanuga no wasai, vemo vatane inta po wasaponae inya! Are pirati po ayao mamaisy obo rave, opamo mamaisy irati Amisy e amune rai, maisyare Kristus opamo mamaisy.

⁸ Yara vatano are pirati po ayao kakai rave tawan kobe, napije pamo Anakakai Akoe apa arikainye waino ai. Weye Anakakai Akoe pirati po ayao kakai rave arono manasyin daveowe noa naiso. Arikainyo Amisy e de indamu Po Anakakai Akoe apa anakere umaso rangkat inda rakanive.

⁹ Vatano are nawirati Amisy e apa arikainye waino mansai, ayao kakai mammo wo rave akatoe ramu weye Amisy e apa kovo wanyine no manuga rai to. Muno Amisy e pirati awa Aja piye, weti ayao kakaije mammo wo rave akatoe ramu weye mamaisy e ramu. ¹⁰ Ranivara wamare wandaen Amisy e apa arikainye nanawi rui muno Anakakai Akoe apa arikainye nanawi rui, weamo awa ana udave raen no taiso: are pirati apa ana dave ma-

mai no Amisye amune raije jewen muno muinyo apa arakova aije jewen, vatane wato awainamo Amisye apa arikainye pa jewena.

Wamuinyo wansai tutudi

¹¹ Arono manasyin dave wapo ayao so ranaun: wamuinyo wansai tutudi. ¹² Kaina pamo vemo wamo amai nora, weye Anakakai Akoe apa arikainye piye, ti po taune apa rijata aubaisy.* Weti ana mbewar ti po aubaisy somamo ana rui? Kaina pamo pariyo apa rijata ai, weye po raen apa rijata apa ana dave mamamo mamai no Amisye amune rai, yara taune apa ana dave mamamo mamaisy ramu. ¹³ Weti sya arakove, weapamo raniwara watano mine so mansanuga mamuno wasai, weamo vemo wapaparo wasai jinya. ¹⁴ Arono wamuinyo wama arakove mansai, wamo raen wamuje wene raora yara wansisa kove obo rai. Weramu are pirati muinyo apa arakove inta aije ramu, opamo ta no tawan no wene rai. ¹⁵ Are pirati anuga mamuno apa arakova ai, Amisye po vatane so aen pare opamo mamaisy watano po apa arakove inta aubai to amaisy. Muno wandae namo watano po vatane maubaisy opamo kovo nuge nuganuije meweno ai.*

¹⁶ Muinye mamamo wananta rai no taiso: Yesus Kristus po anasine raunandea kakai indamu Po wansapaya wama ayao kakaije rai. Maisyare omai ti, mbe unanuive wansai indamu wamo muinye rarorono wama arakove mansai tenambe. Weti koveamo wamo taune wansanasine raunanto ra ngkakai tavon, wirati

* 3:12 Kejadian 4:3-8 * 3:15 Matius 5:21-22

wamo wama arakove mansapaya irati weno nuge nuganuije rai. ¹⁷ Ranivara vatane inta apa ananuge raen manui, umbawe po apa arakove inta aen apa ananuge jajoembe ai yara ponae po aeranandei, weamo Amisye apa muinye no anuga raije ramu. ¹⁸ Sya arikainyo inanuga no wasai, muinye mammo syare wamo raura wansawa bo rai nora, yara wamuinyo tugaive indamu wama ana wandave mo wama muinye raroron kakavimbe.

Wansanuga mammo ngkakavimbe, weamo wambambunin wansayai no Amisye amune rai

¹⁹ Wamuinyo vatano kaijinta mai, weamo wandaen wantavondi Amisye apa ayao tugae rai to ije. Weti wansanuga mammo nsauman no Amisye amune rai. ²⁰ Weramu arono rui wansanuga njaniv weye wansanuga nanto wama ayao kakaije rai, weamo syare vemo wanjani nora. Weye Amisye po anakotare raen tenambe muno Apa muinyo wansai mammo manakoe rave, mo wama yanive umaso rakivan. Maisyare omai ti, vemo wanjaniv akato nora.

²¹ Sya arakovo inanuga no wasai, ranivara wansanuga mo wansanayao ayao kakai inta rai jeben, weamo wanjanive ramu, yara wambambunin wansayai no Amisye amune rai. ²² Ranivara wambeta Apa ananyao Po raugaje rai muno wama ana wandaveye mammo mo aveti anayanambe, wea indati ana rui mirati wandanajo Ai, omamo Po raugaje wansai. ²³ Muno Apa ananyao Po raugaje inda wambeta rai mi som: wamanave Apa Kavo Yesus Kristus ai, muno wamuinyo wansai vambinibe maisyare

Kristus po wansanyaowe ramaisy. ²⁴ Are pirati beto Amisyé apa ananyao Po raugaje rai, opamo be intabove Amisyé ai muno Amisyé tuna no anuga rai. Wandaen Amisyé tuna no wansanuga rai maisyare so: Po apa Anawayo Vambunine raugaje wansai to.

4

Anawae tugae muno anawae angkari

¹ Sya arakovo inanuga no wasai, vemo wapnave vayave ayao rui anawae inta po raura wasai rai jinya. Yara syare wapo ranajo rati indamu wadaen kobe: apa ayao po raura mamó Amisyé apa Anawayo Vambunine mo raugaje ai rako jewena e? Weye soamo anawae angkari wanui utatipu ti wanya mine tename so rai. ² Wandaen vatane inta pamo Anawayo Amisyé nde masyo anuga rai tugaive no taiso: Vatano rui pirati po Yesus Kristus aura pare de no mine so rai be vatanbe, vatano po raura so opirati Anawayo Amisyé nde masyo irati ai. ³ Yara vatano po Yesus Kristus auranare so maisye jeben, vatano napije pamo Anawayo Amisyé no ai pa jewena. Opamo be marovave Kristus ai weye Marova Akoe po anuga raugabe. Wapo ranaun Kristus apa Marova Akoe pare de no mine vone so rai. Syo raura kakavimbe wasai: soamo no no mine vone so rai to, po vatano wanui manuga raugabe.

⁴ Weramu sya arikainyo inanuga no wasai, weapamo Amisyé apa kawasae nawirati weap. Muno weapo anawae angkarije umawe mapinde to, weye Anawayo Amisyé no irati wasai mamó Ama vambunine manakoe, mo Anakakai Akoe no no

mine vone so apa vambunine rakivan. ⁵ Anawae angkari onawamo mine so amaura mai. Weti awa ana wayao dai maisyare vatano mine so awa ana wo ratantona obo ramaisy, weti vatano mine so wo awa ayaowe raraniv. ⁶ Weramu wamamo Amisyé apa arikainye waino wansai. Are pirati po Amisyé aen, opamo po reama wandaura raraniv. Yara vatano siso Amisyé apa kawasae matavone jeben, opamo po reama wandaura raranive ramu. Weti nai maisya umba wananta irati anawae tugae mai muno anawae angkari mai.

Amisyé opi muiny

⁷ Sya arakovo inanuga no wasai, syare wamuinyo wansai tutudi, weye muinye somamo Amisyé po raugaje wansai. Vatano rui pi muiny opamo Amisyé apa arikainye piye muno po Amisyé aen. ⁸ Weramu vatano rui pi muinye ramu, opamo pantatukambe Amisyé ai. Weye Amisyé opi muiny. ⁹ Amisyé po apa muinye raroron kakavimbe wansai no taiso: Po apa Kavó intabo dave Yesus Kristus atutir de no mine vone so rai indamu Po kovo nuge nunganuije raunande wansai. ¹⁰ Weti so mirati muiny: Vatano wami wamuinyo Amisyé ai toa jebena, yara Amisyé pi muinyo wansai muno Po apa Kavó atutir Po anasine raunande kakai indamu Po wama ayao kakai ranawan ti mpaya wansai, wirati Po wansaugav wamakare Amisyé ai. ¹¹ Sya arakovo inanuga no wasai, Amisyé po apa muinye rarorono wansai taije maisy, weti koveamo wamuinyo wansai tutudi. ¹² Vatane wamamo inta po Amisyé aeno amije rai intai ma jeben

tenambe. Weramu wamuinyo wansai tutudi, weamo Amisyé tuna no wansanuga rai muno Apa muinye ntubai no wansanuga rai ti mamai dave.

¹³ Wandaen wambe intabove Amisyé ai muno Amisyé tuna no wansanuga rai no taiso: Po apa Anawayo Vambunine raugaje no wansai to.

¹⁴ Reamamo reamo Arikainyo Amisyé aeno taune reansamije rai to, weti reamo avovo vatane mansai reamare Injayo Amisyé po apa Arikainye so atutir ti de no mine so indamu Po vatane mapaya awa ayao kakaije rai.

¹⁵ Vatano are pirati po Yesus aura pare, “Yesus opamo Arikainyo Amisyé,” Amisyé no tawan no vatano napije anuga rai. Muno vatano napije be intabove Amisyé ai.

¹⁶ Weti Amisyé apa muinyo Po raunande wansai mamó wamo raen muno wamanave rai.

Amisyé opirati muiny. Are pi muinyo Amisyé ai muno apa arakove mai tavon, vatano napije be intabove Amisyé ai muno Amisyé tuna no anuga rai.

¹⁷ Maisyare omaisy, wama muinye miridi nseo ti mamai dave. Indati wambambunin wansayai no Amisyé amun arono masyoto Po wansanajo wama ana wandave rai, weye wama ana wandave no mine vone so mamaisyó Kristus apa rai.

¹⁸ Amisyé muinyo wansai ti wanjanive ramu. Weye Apa muinyo ntairi wansanuga rai, weamo wama yanive raumandi vintabo. Weramu arono rui wamo ratantona Amisyé pare po mangke raugaje wansai, weamo wanjaniv, muno wanjaniv taiso mare wananta Apa muinye rai rainy.

¹⁹ Amisyé muinyo wansai wusyimbe to, wirati wamuiny tavone so.

²⁰ Ranivara vatane inta po

taune aura pare: “Rimuinyo Amisye ai,” weramu anuga mamuno apa arakova ai, weamo vatano napije aruriat akoe pije. Weye apa arakova pamo po aeno amije rai pije, damu muinyo ai ramu. Weti umba pare muinyo Amisyo po aene jewene Aije, opamo mamaisye ramu. ²¹ Ananyaowe so-mamo Amisye po raunande: Are pirati muinyo Amisye ai, syare muiny irati apa arakove mai tavon.

5

Wamanave Amisye apa Kavoy ai, indati wamo mine so ama vambunino ngkakainoanaive rapinde

¹ Are pirati panave pare Yesus opirati Mesias,* vatano napije pamo Amisye apa arikainye pije. Muno are pirati muiny irati Injayo Amisye ai, weamo muiny irati Amisye apa arikainye mansai tavon. ² Wandaen wamuiny irati Amisye apa arikainye mansai mamomaisyare so: arono rui wamuiny irati Amisye ai muno wantavondijo Apa ananyao Po raugaje wansaije rai. ³ Arono wantataaje irati Amisye apa ananyao Po wansatuti dai rai, wemaisya umba wamo muinye rarorono Amisye aije. Apa ananyao Po raugaje mamomangke ramu. ⁴ Vatano rui nawirati Amisye apa arikainye waino mansai, wenanawamo wo mine vone so ama vambunino mamun rapinde. Muno ana mo ransui ti mo rapinde mamowama anave Yesus ai. ⁵ Are nawirati ubambunin wo mine vone so ama vambunino mamun rapinde?

* **5:1** Tamo Mesias mo tamo Kristus ramaisy, ama ayao mare, “Vatano Amisye po apatimu indamu be akari titive wansai.”

Vatano nanawirati wanave ware, “Yesus opamo Arikainyo Amisye pije.” Obo nawirati umamaisy.

Ayao kovo mo Yesus aura kakavimbe

⁶ Yesus Kristus de no mine so, umba augasyo kuvuni mana rai muno Apa mavu nsororop arono kakai. Yesus de indamu augasyo kuvuni mana rai vayave ramu, yara de indamu Apa mavu nsororop ti kakai tavon. Weti mana muno mavu umaso mo Yesus aroron kakavimbe Opamo Arikainyo Amisye pije. Ayao umaso mamu Anawayo Vambunine mo raura mare no rai tugae, muno Ama ana mo raura mamu mayarurijabe inta raije ramu. ⁷ Weti ayao raura kakavimbe somamo kotare mandeija, no taiso:

⁸ Anawayo Vambunine maava, mana mirati Yesus augasyo kuvunijo rai maava, mavugo nsororop arono Yesus kakai wem. Mandeije umaso ma awa ayao mbe intabove, wo Yesus Kristus aura kakavimbe ware, “Yesus opamo Arikainyo Amisye pije.” ⁹ Arono vatane wo ayao inta raura kakavimbe wansai, weamo wamanave rai. Weramu Amisye apa ayao Po raura mamu mbambunin dave, mo vatane awa ayaowe rakivan. Wepi po ayao umawe raura, Po apa Kavoy aura kakavimbe wansai. ¹⁰ Weti are pirati panave irati Arikainyo Amisye ai, opamo po Amisye apa ayao umawe raen tugaive no anuga rai to. Weramu vatano panave Amisye ai ramu, opamo po Amisye atantona pare payarurijabevea, weye panave ayao Amisye po raugave Apa Kavoy Yesus Kristus ai raije ramu. ¹¹ Apa

ayao mi so: Amisye po kovo nuge nuganuije raunande wansai, muno kove umaso ama ruke no no Apa Kavō Yesusa nui. ¹² Vatano wo Amisye apa Kavō aen no manuga rai, onawamo awave kovo nuge nuganuije rai. Muno vatano wantatukambe Amisye apa Kavō ai, onawamo awave kovo nuge nuganuije raije ramu.

Ranivara wamo ana inta ranajo seo Amisye ai, Opamo po wansaraniv

¹³ Syo ayaowe so ratoe more irati vatano wapave irati Arikainyo Amisye ai, syo ratoe indamu wadaen weapamo wapave kovo nuge nuganuije rai. ¹⁴ Wamamo wambambunino wama anave rai weye wama ana wandanajo seo Amisye ai mamaisyo Apa bekere rai, weamo Po raraniv. ¹⁵ Wandaen Po wansaraniv arono wamo ana inta ranajo seo Ai, weaveti wandaen Po wama ana wandanajo raunande aje.

¹⁶ Wapo wapa arakove inta aen po ayao kakaije inta rave, weamo syare wabe sambayambe ai. Wea indati Amisye po wapa sambaya umaso raraniv, umba Po kove raugakare wapa arakove umaso ai. Weramu ayao kakaije inta mamō Amisye pare po rapaya vatano po rave aije ramu. Jewen dave.† Yara Amisye po mangke weno nuge nuganui obo raugaje vatane wato ai. Weti vatano are pirati apa ayao kakaije no tai wemaisyamo, vemo wapo Amisye anajo ai nora. ¹⁷ Anakotaro rui wandaveti ngkakai omamo ayao kakaije ma.

† **5:16** Ayao kakai namije no taiso: vatane po Yesus Kristus amamarave muno be marovave Ai (2:22-23).

Weramu ayao kakaijo mo weno nuge nuganui raugav mamoo ayao kakai tenambe jewen.

¹⁸ Wamo raen vatano Amisye apa arikainye waino mansai onawamo ayao kakai mamoo wo rave tutire ramu, weye Arikainyo Amisye po mansaeranande muno Anakakai Akoe pamo bambunin po mansave tatugadije ramu. ¹⁹ Vatano mine vone so una irati Anakakai Akoe anem uga rai tenambe muno wepi be akarive mai. Weramu wandaen wamamo Amisye apa arikainye waino wansai. ²⁰ Wandaen Arikainyo Amisye de to muno Po wansakarikuga raneka inda mbar ti wamo Amisyo tugae aen. Wambe intabove Amisyo tugae ai weye wambe intabove Apa Kavo Yesus Kristus ai. Opamo Amisyo tugae pije, muno Po kovo nuge nuganuije raunande wansai.

²¹ Weti sya arikainyo inanuga no wasai, syare wapanave Amisyo tugae obo ai, yara vemo wapo yare raugavo wasarijat inya.

*Risy,
Yohanes*

Ayao amisy urairi wanyin
New Testament in Yawa (ID:yva:Yawa)
Perjanjian Baru di Yawa

copyright © 2011 Wycliffe Bible Translators, Inc.

Language: Yawa

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Yawa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

PDF generated using Haiola and XeLaTeX on 22 Feb 2024 from source files
dated 29 Jan 2022

f32aa90e-2509-5f04-a3ab-17abf547cfde